



12. august 2009

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Naalakkersuisunut apeqqut: Meeqqagut qimminit paannittartunit nukittuunillu saassunneqarnissaannut illersorniarlugit Naalakkersuisut qanoq iliuuseqarniarpat?
(Inatsisartuni ilaasortaq Justus Hansen, Demokraatit)

Demokraatinit isumaqartuaannarnikuuvugut pitsaaliuineq siumut aqutissaasoq. Isumaqarpugut pingaaruteqartupilussuusoq ajornartorsiutip takkussinnaasup siumut isiginiarneqareernissaa, taamaalillunilu ajornartorsiutip pinnginnerani iliuusissamik nassaartoqariissasoq.

Demokraatit isumaqarput qimmit paannittartut nukittuullu inuiaqatigiit atugarissaarnissaannut ajornartorsiortitsilersinnaasut, taamaattumillu isumaqarpugut Naalakkersuisut piaartumik inuiaqatigiinnut illersuutaasinnaasunik – ingammik meeqqanut – iliuusissamik isumaginnittariaqartut, ingammik qimminut taamaattunut tunngatillugu.

Danmarkimi aasap ingerlanerani qimmit paannittartut nukittuullu annertoorujussuarmik ajornartorsiutigineqarsimapput, meeqqanik, inersimasunik qimminillu allanik saassussisimanerat pissutigalugu. Tamanna pillugu statsministeri Lars Løkke Rasmussen imatut oqaaseqarpoq:

”Kissaatiginngilarput inuiaqatigiinni inuussalluta, qitornarput qimmerpulluunniit puddeli pisuttuaqatigisinnaanagit, qimmimit nukittuumit saassunneqarnissaannut ulorianartorsiorsinnaasut nalunagu. Taamaammat periarfissaq atorluarlugu oqarusuppunga, naalakkersuisut tamanna pillugu iliuuseqarusummata. Folketingip katersuunnissaani aallatingajalersumi pisarialimmik inatsisiliortoqarnissaanik aallartitsisoqarnissaa suliarissavarput, taamaalilluta qimmit nukittuut inerteqqutaalernissaannik sunniuteqarluartumik tigussaasumillu pilersitsisoqarnissaanik qularnaariniarluta.”

Danmarkimi pineqartunut tunngatillugu inatsisiliortoqarnialerpoq, Demokraatillu tamanna pillugu neriuutigaat Naalakkersuisut Kalaallit Nunaanni aamma assigusumik suliniartoqalissasoq.

Demokraatininngaanniit ilisimaneqarput, qimmit qimuttut qitsuuteqarnerlu pillugit inatsisit ullumikkut atuutereersut, inatsisartut inatsisiliaanni nr. 18-imi 30. oktober 1998-imeersut. Uani iluarisimaarlugu allapparput, Kalaallit Nunaanni inatsisitigut piumasarineqarmat qimmit arfinillit sinnerlugit qaammatillit pitoqqaneqassasut, mattuteqqaneqassasut, qimmit ungaluini isersimatinneqassasut IMALUUNNIIT PITUUTSERLUGIT AATSAAT INGERLANNEQASSASUT. Inatsit taanna Danmarkimi inatsisinit atuuttuniit sakkortuneruvoq, tassanimi qimmit pituutaqartinnagit



DEMOKRAATIT
DEMOKRATERNE

angallanneqarsinnaasarput, qimmeq aqussinnaagaanni. Taassuma saniatigut ajunngitsutut isigaarput, qimmit inunnik saassussisimasut imaluunniit uumasunik allanik kiisisimasut INGERLAANNAQ toqunneqartassasut. Danmarkimi tamanna piumasaqaataangilaq.

Demokraatit ilaatigut toqqissisimanartippaat inatsisit sakkortummata, kisiannili piumaneruarpurput qimmit taamatut ittut Kalaalit Nunaanni pigineqarsinnaanatillu eqqunneqarsinnaannginnissaat.

Naalakkersuisut qinnuigaakka apeqqut ullut qulit qaangiutsinnagit akissagaat.